



Cussegliera guvernativa Barbara Janom Steiner ed Ernst Wyrsh, il president da Hotellerieuisse Grischun.



Vitus Dermont (a san.), il president dal cussegl grond cun Martin Grichting, vicari general da l'investgiu da Cuira.

«Betg daventar ina regiun da lamentim»

Grischun Vacanzas: Apéro da Bumaun

DA GION NUTEGN STGIER / ANR

■ **S'adattar dapli a la digitalisaziun globala e cunzunt dar dapli paisa a la cumadaivladad per il giast, quai saja en l'avegnir indispensabel per il turissem grischun. Marcel Friberg, il president da l'organisaziun turistica, ha er ditg da sustegnair projects sco il Parc Adula ubain gieus olimpics d'enviern.** En noss chantun avain nus strusch ina occurrenza ch'attira uschè blera prominenzia sco l'apéro da Bumaun da Grischun Vacanzas. Er ier è stada da la partida la «crème de la crème» dal Grischun per sa laschar ir bain cun rosoli, vin alv e da tuttas sorts piculezzas da mangiar. Persunas da num e pum da l'entir chantun èn vegnidas en il curtin da l'Hotel Marsöl a Cuira per far in viva sin il nov onn. A pled tar quel apéro da Bumaun è er vegnì il cusseglier guvernativ e schef dal departament d'economia publica, *Jon Domenic Parolini*. El ha ditg als preschents d'avair er en l'avegnir avunda curaschi, d'esser innovativs e da s'engaschar cuminaivel per tegnair pitg a las grondas sfidas en la bransch turistica. La politica haja da procurar per bunas cundiziuns da basa e sustegnair projects novs, dentant influenzer real la situaziun dal turissem saja strusch pusaisvel.

S'adattar a las midadas

Sa drizza a la raspada illustra è lura er *Marcel Friberg*, il president da Grischun Vacanzas. A l'entschatta da ses pled ha il Sursilvan ditg che las sfidas per il turissem sajan anc adina fitg grondas. Il mund sa mida successivmain gist quai che pertutga la digitalisaziun, la comunicaziun, la societad ed il svilup. En l'avegnir haja er Grischun Vacanzas, gea mintgin che saja dependent dal turissem, da s'adattar a quellas midadas per esser «à jour». Cunzunt quai che pertutga la digitalisaziun commerziala haja er Grischun Vacanzas da daventar activ e betg il davos pli professional per esser abel da concurrer sin il martgà. Er sch'el temp saja fitg dir per il turissem sajan fatalismus e pessimismus betg il recept per megliar la situaziun. Il Grischun cun ina natira intacta, cun fitg buns products, cun ina gastronomia e hotellaria excellenta, cun ina cultura fitg vasta dastga betg daventar ina regiun da lamentim e resignaziun, ha punctuà *Marcel Friberg*.

Mantegnair ils pretschs

Cumplet sbaglià saja da reducir ils pretschs cun esser ils giasts fidaivels anc adina prontos da pajar per in bun

product. Ina basa da frequenzas dovra mintga manaschi per avair ina rendita e per savair far investziuns. «Nus essan en ina situaziun ventiraivla dad avair blers e buns giasts svizzers e tutina avain nus urgent d'extender la reclama gist sur ils meds digital per vegnir tar auters giasts», menziuna *Marcel Friberg*. En l'avegnir saja da tgirar anc pli bain ils possessurs da segundas abitaziuns, uschia che quels daventian anc megliers ambassadurs per il Grischun. Er ils numerus giuven Grischuns che lavuran ubain van a scola a la Bassa duaian esser quels che fan attent blers a la gronda vastadad turistica da noss chantun.

Trais aspects impurtants

Pli gronda che la rait d'ambassadurs saja e dapli ch'il Grischun profiteschia. En l'avegnir saja fitg urgent da dar dapli paisa a la cumadaivladad, mobilitad ed er al confort, quai sajan trais aspects impurtants per esser ina buna regiun da vacanzas. Ina colliaziun directa cun l'eroport da Turitg savess esser in bun exempel per porscher als giasts in servis perfetg, ha ditg *Marcel Friberg*. Pli cumadaivel ch'i vegnia fatg ad in giast e pli engraziavel saja quel. Il Grischun saja e restia vinavant turisticamain attractiv.



Er stads a l'occurrenza èn cusseglier dals chantuns *Stefan Engler* (a san.) e cusseglier guvernativ *Jon Domenic Parolini*.

FOTOS G. N. STGIER



Il president da Grischun *Pencilaras*, *Silvio Schmid* (a san.) cun *Peter Engler*, il director administrativ da *Lai Pencilaras SA*.

Er da la partida a l'apéro èn stads *Marc Gianola* (a dretga), l'antieriu giugader da hockey da Tavau e *Georg Brosi*, l'inspector chantunal da chatscha.



Viva sin l'onn nov: *Giovanni Netzer*, l'intendant da l'Origen Festival Cultural e (a dretga) *Florence Ursprung*, sia secretaria.



In cusseglier nazional sursilvan ed in cusseglier nazional engiadinais: *Martin Candinas* e *Duri Campell* (da san.).

